

Na osnovu člana 17. Zakona o Vijeću ministara Bosne i Hercegovine („Službeni glasnik BiH“, br. 30/03, 42/03, 81/06, 76/07, 81/07, 94/07 i 24/08), a u vezi s članom 30. stav 1. tačka k) i stav 2. i članom 41. Zakona o platama i naknadama u institucijama Bosne i Hercegovine („Službeni glasnik BiH“, broj 50/08), članom 50. stav 6. Zakona o radu u institucijama Bosne i Hercegovine („Službeni glasnik BiH“, br. 26/04, 7/05 i 48/05), Vijeće ministara Bosne i Hercegovine na 71. sjednici, održanoj 29.12.2008. godine, donijelo je

ODLUKU

o visini, načinu i postupku ostvarivanja prava na naknadu za prevoz na posao i prevoz s posla u institucijama Bosne i Hercegovine

Član 1.

(Predmet Odluke)

Ovom Odlukom uređuje se ostvarivanje prava zaposlenih u institucijama Bosne i Hercegovine na naknadu za prevoz na posao i prevoz s posla, u skladu sa članom 41. Zakona o platama i naknadama u institucijama Bosne i Hercegovine i članom 50. stav 4. a) Zakona o radu u institucijama Bosne i Hercegovine.

Član 2.

(Pravo na naknadu)

Pravo na naknadu troškova prevoza na posao i prevoza s posla zaposlenim u institucijama Bosne i Hercegovine ostvaruje se:

- a) Refundacijom stvarnih troškova prevoza na posao i prevoza s posla na osnovu mjesečnih karti prevoznika, koje zaposleni dostavlja u skladu sa procedurom propisanom ovom Odlukom.
- b) Isplatom naknade troškova prevoza na posao i prevoza s posla u drugim slučajevima u skladu sa odredbama ove Odluke.

Član 3.

(Visina naknade)

- (1) Zaposlenom u institucijama BiH čije je mjesto rada i prebivališta isto, a u istom je organiziran javni gradski prevoz, pripada pravo na naknadu troškova gradskog prevoza u visini mjesečne karte.
- (2) Zaposlenom čije je mjesto rada udaljeno do 80 kilometara od prebivališta pripada pravo na nabavku mjesečne karte ili refundaciju stvarnih troškova mjesečne karte, pod uslovom da dnevno putuje na relaciji mjesto rada – mjesto prebivališta.
- (3) Ukoliko registrirani prevoznik na određenoj lokaciji ne izdaje mjesečnu kartu, ili je vozni red organiziran tako da zaposleni ne može u razumno vrijeme koristiti javni prevoz za dolazak na posao i odlazak sa posla, te zaposleni zbog toga ne koristi pravo nabavke mjesečne karte ili refundacije stvarnih troškova mjesečne karte, pripada mu pravo na naknadu troškova prevoza obračunatu na osnovu 70% vrijednosti pojedinačne karte na istoj relaciji.
- (4) Zaposlenom koji ne putuje dnevno od mjesta prebivališta do mjesta rada, kao i zaposlenom čije je mjesto rada udaljeno od mjesta prebivališta više od 80 km, pripada pravo na mjesečnu novčanu naknadu u visini osam pojedinačnih karti javnog prevoznika za relaciju: mjesto rada zaposlenog – najbliža stanica mjestu prebivališta zaposlenog, koja je utvrđena linijskim međugradskim prevozom.

- (5) Visina naknada utvrdit će se na temelju cjenovnika registriranih prevoznika na konkretnim relacijama na kojima putuju zaposleni u institucijama Bosne i Hercegovine.
- (6) Ukoliko postoji razlika u cijeni ovlaštenih prevoznika na istoj relaciji, institucija Bosne i Hercegovine će isplaćivati naknadu troškova prevoza na posao i prevoz s posla koju obračunava prevoznik s najnižom cijenom prevoza.
- (7) Visina mjesečne naknade za prevoz na posao i prevoza s posla ne može biti veća od iznosa mjesečne naknade za troškove smještaja, utvrđene u skladu sa odgovarajućim odredbama Zakona o platama i naknadama u institucijama Bosne i Hercegovine.

Član 4.

(Postupak ostvarivanje prava na naknadu)

- (1) Kako bi zaposleni ostvarili pravo na naknadu za prevoz na posao i prevoz s posla, dužni su priložiti zahtjev za naknadu troškova prevoza prema obrascu čiji sadržaj utvrđuje Ministarstvo finansija i trezora.
- (2) Pravo na naknadu troškova prevoza zaposleni iz člana 3. st. (2) i (3) može ostvariti prema mjestu boravišta, ukoliko privremeno boravi izvan mjesta prebivališta, s tim da naknada za prevoz u tom slučaju ne može biti veća od naknade koju bi zaposleni ostvarivao prema mjestu prebivališta po tom osnovu.
- (3) Institucija Bosne i Hercegovine službenim putem osigurava podatke o cjenovniku prevoza i podatke o voznom redu upitom kod registriranih prevoznika.
- (4) Osnov za obračun naknade za prevoz izvan područja gdje je organiziran gradski prevoz je relacija: mjesto rada zaposlenog – najbliža stanica mjestu prebivališta zaposlenog, koja je utvrđena linijskim međugradskim prevozom.
- (5) Liste korisnika prava na naknadu za prevoz na posao i prevoz s posla su javne, a institucije Bosne i Hercegovine obavezne su objaviti ih na oglasnim pločama i vlastitim internet stranicama.

Član 5.

(Istinitost podataka)

- (1) Osnovanost zahtjeva za naknadu troškova prevoza na posao i prevoza s posla utvrđuje se na osnovu podataka iz prijave o mjestu prebivališta prema službenim ličnim podacima iz evidencija koje službeno vode nadležne organizacione jedinice za pravne i kadrovske poslove u institucijama Bosne i Hercegovine i podataka o službenim tarifama gradskog i međugradskog prevoza.
- (2) Dostavljanje neistinitih podataka ili neažuriranje podataka vezanih za ostvarivanje prava na naknadu prevoza na posao i prevoza s posla smatra se težom povredom radnih dužnosti i podliježe disciplinskoj i materijalnoj odgovornosti.

Član 6.

(Obračun i isplata naknada)

Obračun i isplata naknada za troškove prevoza na posao i prevoza s posla zaposlenih u institucijama Bosne i Hercegovine vrši se mjesečno u tekućem mjesecu za prethodni mjesec na temelju evidencije o prisustvu na radu i isplata naknade vrši se uz isplatu plate za prethodni mjesec.

Član 7.

(Izuzeci u primjeni)

- (1) Zaposleni kojem pripada pravo na korištenje službenog ili privatnog automobila, utvrđeno u skladu sa članom 49. Zakona o platama i naknadama u institucijama Bosne i Hercegovine, ne može ostvariti pravo na naknadu troškova prevoza na posao i prevoza s posla u skladu sa čl. 2. i 3. ove Odluke.
- (2) Ukoliko je institucija organizirala prevoz zaposlenih na posao i s posla, tada zaposlenima ne pripada pravo na naknadu troškova prevoza na posao i prevoza s posla u skladu sa čl. 2. i 3. ove Odluke.
- (3) Zaposlenom ne pripada pravo na novčanu naknadu na ime prevoza na posao i prevoza s posla za dane provedene na bolovanju, godišnjem odmoru ili bilo kom drugom odsustvu s rada koje koristi u skladu sa zakonom.

Član 8.

(Institucije odgovorne za provođenje Odluke)


Za realizaciju ove Odluke zadužuju se institucije Bosne i Hercegovine i Ministarstvo finansija i trezora.

Član 9.

(Stupanje na snagu i primjena)

Odluka stupa na snagu narednog dana od dana objave u „Službenom glasniku BiH“, a primjenjivat će se od 01.01.2009. godine.

26.
VM broj 235 /08
29.12.2008. godine
Sarajevo



**PREDSJEDAVAJUĆI
VIJEĆA MINISTARA BIH
dr. Nikola Špirić**

Nikola Špirić